

# Giubileum «100 onns Lia Rumantscha» a Zuoz

■ (lr) Il giubileum «100 onns Lia Rumantscha» dal 1. fin ils 18 d'avust 2019 ha lieu a Zuoz. La suprastanza da la Lia Rumantscha (LR) ha tschernì la vischnanca da Zuoz or da 13 candidaturas. Enturn il «Plaz» amez il vitg da Zuoz vul la LR crear in lieu d'inscunter e da festa durant il giubileum. Cun in appel public ha la LR tschertgà ina vischnanca rumantscha interessada dad ospitar il giubileum «100 onns Lia Rumantscha» l'avust 2019. La suprastanza da la LR, presidiada da *Johannes Flury*, ha grond plashair che 13 vischnancas da differentas regiuns èn s'annunziadas ed han mussà interess: Albula/Alvra, Bever, Domat/Ems, Ilanz/Glion, Lantsch/Lenz, Disentis/Mustér, Puntraschigna, Samedan, Scuol, Trun, Tujetsch, Zernez e Zuoz.

En sia seduta dals 11 da fanadur 2018 ha la suprastanza da la LR tschernì la vischnanca da Zuoz sco lieu ospitant per il giubileum «100 onns Lia Rumantscha». Tgenins èn ils motivs per tschernir Zuoz? Il rumantsch en l'Engiadina è periclità. A Zuoz reusseschi da mantegnair il rumantsch malgrà l'influenza dad autras linguas e dal turissem. Il bel caracter da vitg enturn il «Plaz» permetta da crear in'atmosfera d'inscunter e da festa per il program dal giubileum.

Cun in prolog cun occurrenzas inizias en las regiuns rumantschas, en la region da Cuir ed ordaifer il Grischun fa la LR attent a partir dal fanadur 2019 sin il giubileum che vegn festivà a Zuoz dal 1. fin ils 18 d'avust 2019. Previs èn in festival cun in teater musical e disematics per pitschen e grond. Ils puncts centrals dal program preschenta la LR quest atun.

